

Despues cu garantia di Bestuurscollege na 1985 a costa Aruba hopi

ARUBA MESTER PAGA GOLDEN TULIP PA SU SALIDA!

ORANJESTAD (AAN): Mientras trahadornan di Golden Tulip na Aruba ta biba den angustia grandi pa un aña caba, na Hulanda negociacionnan ta continua cu Golden Tulip pa mira con por paga e compania pa e bandona operacion di e hotel na Aruba.

E contrato cu a worde firma na 1985 dor di Bestuurscollege (cu Nelson Oduber como Diputado pa Desaroyo Economico) ta pone cu awe Golden Tulip ta e gran ganador den e problemanan serio cu Aruba ta confronta cu e hotel aki.

Aunke e hotel tabata tin futuro, e contrato cu a worde firma y e garantia cu Bestuurscollege a duna na 1985, a causa caida di tur posibilidad positivo pa e hotel.

Na e momentonan aki Aruba mester mira kico e por paga Golden Tulip pa asina e cadena hotelero por bandona Aruba. Esey ta significa cu Aruba mester bay paga mas pa e contrato cu Bestuurscollege a firma na 1985.

Ya Aruba a paga alrededor

di 35 Mion pa e garantia cu e Bestuurscollegedi 1985 a alcanza. Sin duda Golden Tulip lo no acepta Un Florin, pero lo bay pa mucho mas y e placa aki mester sali for di caha di Aruba.

Mientras na Aruba tur trahador, di gerencia te e rango di mas abao, ta biba den angustia, Golden Tulip ta sinta tranquil ariba su stul ta warda e momento cu e alcanza un areglo. Interesante ta e informe cu e persona cu ta negocia cu Golden Tulip na nomber di Aruba ta un Hulandes, cu a forma parti di e Comision Biesheuvel.

Un informe, cu ta worde observa como preocupante dor di personanan cu ta conciente cu Golden Tulip ta un compania den cual Hulanda tin interes grandisimo. Si sigui e raiz di Golden Tulip lo mira con e interes di Golden Tulip ta mishi directamente cu e interes di Hulanda.

Aparentemente Gobierno mes no sa kico ta pasa, pasobra instancianan cu acerca Gobierno pa informacion no ta haya esaki. Mescos cu Rap-

port Biesheuvel tur loke tin di haci cu Golden Tulip ta parce secreto pero mas y mas e impresion ta worde crea cu e Rapport Biesheuvel a worde scondi pasobra e no ta cumbini Gobierno Oduber,

mientras cu Gobierno Oduber no ta duna ningun informacion encuan to Golden Tulip pasobra Gobierno mes no sa kico pa haci.

Mientrastanto Golden Tulip ta un problema pa henter

sector turistico di Aruba pasobra casino ta cera y e situa-

cion ta marca pa tension. Turistanan mal contento ta

haci mal propaganda y Aruba ta sali perhudica.